

Ha'u nia respetus ba

- Sua Exelénsia Señor José Lucas do Carmo da Silva, Ministru Turizmu, Komérsiu no Indústria Timor-Leste
- Sua Exelénsia Vise Ministra ba Turizmu Komunitáriu Inácia da Conceição Teixeira
- Sua Exelénsia Embaixadór Portugal Manuel Gonçalves de Jesus
- Sua Exelénsia Embaixadór Indonézia Shat Sitorus
- Sua Exelénsia Embaixadór Nova Zelandia Phillip Hewitt

Boanoite kolega-sira hotu. Prazer ida bele mai hamutuk ho ita-boot sira hodi celebra Loron Turizmu Mundiál no rekoñese ema-sira ne'ebé halo ona kontribuisaun importante tebes ba turizmu iha Timor-Leste. Ha'u hein atu rona anúnsiu ba joven embaixadór turizmu no manan-nain turizmu nian ba tinan rihun rua ruanulu no rihun rua ruanulu resin ida (2020-2021)! Ne'e sei eleva Timor-Leste nia esforsu-sira hodi promove turizmu iha nasaun ne'e ne'ebé furak maibé seidauk deskobre.

Tinan ida-ne'e lori dezafiu barak ba mundu tomak. Ita kontinua hasoru ameasa husi pandemia COVID-19 no ninia impaktu finanseiru ba mundu tomak. Ha'u impresionada tebes ho Timor-Leste nia susesu iha prevensaun propagasaun virus ida-ne'e iha railaran no ha'u apela ba ita hotu-hotu atu mantein saúde no seguransa ema Timoroan hotu-hotu sai hanesan ita-nia prioridade prinsipál.

Estadus Unidus apoia ona Timor-Leste nia esforsu-sira hodi kombate COVID-19, inklui apoiu orsamentu dólar amerikanu miliaun rua pontu haat (\$2.4 million). Iha Embaixada Estadus Unidus iha Dili ami kontinua dezenvolve programa inovadora-sira ne'ebé haforte Timor-Leste nia infraestrutura saúde, apoia traballadór lokál-sira, no sosa produktu ijiéne-sira ne'ebé prodús iha railaran. Ezemplu, ami foin daudaun ne'e fornese fundu ba feto lokál-sira hodi prodús máskaras rihun resin

ne'ebé tuirmai Ministériu Edukasaun distribui hikas ba estudante-sira iha nasaun laran.

Programa turizmu doméstiku ne'e hanesan ezemplu ida-tan husi adapta ami-nia programa-sira hodi responde ba dezafiu ohin loron nian. Governu Estados Unidus nia USAID nia Projetu Turizmu ba Ema Hotu komesa iha tinan rihun rua sanulu resin ualu (2018) ho orsamentu dólar amerikanu miliaun sia (\$9 million).

Turizmu ba Ema Hotu diretamente apoia Timor-Leste nia objetivu rasik atu aumenta kreximentu turizmu inkluzivu no sustentável. USAID serbisu-besik ho Ministériu Turizmu hodi adapta programa ida-ne'e ho énfaze ba iha turizmu doméstiku. Ami mós serbisu ho parseiru dezvoltamentu-sira seluk iha ne'e, hanesan Nova Zelandia, Austrália, UNDP no Uniaun Europeia. Ita hotu-hotu fahe objetivus hanesan – hodi promove Timor-Leste nia kompetividade nu'udar destinu turizmu internasionál enkuantu prezerva nafatin ninia patrimóniu ambientál no kulturál ne'ebé úniku.

Projetu Turizmu ba Ema Hotu halibur ona parseria públiku-privadu hodi apoia Timor-Leste nia atrasaun turizmu balun ne'ebé importante liuhotu, hanesan Cristo Rei. Serbisu-hamutuk ho grupu ambientalista importante husi Estados Unidus naran Mission Blue hodi deklarasiun tasi furak no riku ho bio-diversidade iha Estreitu Wetar sai nu'udar Fatin Esperansa ka Hope Spot ida. Dezipnasaun ida-ne'e introdús Timor-Leste iha mundu tomak. Turizmu ba Ema Hotu serbisu-hamutuk governu Timor-Leste hodi eleva Tais atu sai Patrimóniu Mundiál tuir dezipnasaun UNESCO nian.

Projetu ne'e serbisu-besik ho Ministériu Turizmu iha kriaun Timor-Leste nia website turizmu. Turizmu ba Ema Hotu, ho moto “Timor-Leste: Deskobre Fatin ne'ebé Seidauk Deskobre” kolabora mós ho industria no empreza turizmu-sira hodi promove turizmu doméstiku no hastag “Hau-nia Timor-Leste.” Hirak ne'e hotu hanesan pasu

importante-sira durante tempu atuál iha ne'ebé viajen turista internasionál efetivamente paradu hela. Di'ak ba Timor-Leste atu uza tempu agora ne'e ho di'ak hodi dezenvolve ninia rikezas turizmu.

Programa ida-ne'e nu'udar ezemplu exelente ida oinsá Estados Unidos no Timor-Leste nia objetivus aliña ba malu. Elementu xave ida husi Estados Unidos nia estratéjia ba ita-nia rejiaun Indo-Pasífiku inkluzivu maka apoia ekonomia forte sira, bazeia ba merkadu no enkoraja dezenvolvimentu sustentável. Iha Embaixada ami halo knaar hirak ne'e ho maneira oin-oin. Lihusi programa-sira hanesan USAID nia projetus Turizmu ba Ema Hotu no Avansa Agrikultura ami serbisu hodi fó ba Timoroan-sira ferramentus sira presiza hodi mellora negósiu kiik no liga ho merkadu foun-sira.

Ami mós dezenvolve joven empreendedór-sira liuhusi programa interkámbiu oin-oin, bolsa-estudus, no semináriu-sira ba dezenvolvimentu profisionál. Ami mós sente orgullu tebes ho Ami-nia Inisiativa Joven Líder Sudeste Aziátika (YSEALI) no ninia membru-sira – joven Timoroan inovadór-sira, akadémiku, no emprezáriu-sira ne'ebé serbisu makaas ba sira-nia comunidade no nasaun nia moris-di'ak. Nomós, Programa Interkámbiu Profisionál Turizmu nian iha illas Pasífiku dezenvolve kapasidade husi profisionais iha setór turizmu liuhusi viajen interkámbiu ba iha Hawai'i.

Estados Unidos no ami-nia parseiru-sira ho hanoin-hanesan investe iha dezenvolvimentu setór privadu Timor-Leste nian tanba ami hatene importánsia husi ekonomia lokál ba iha Timor-Leste nia susesu iha ninia jornada ba auto-sufisiénsia. Ita-boot-sira barak ohin iha ne'e nu'udar líderes iha Timor-Leste nia setór privadu, no ha'u enkoraja ita-boot sira hotu hodi hanoin didi'ak kona-ba papel importante hirak ita-boot sira dezempeña hodi dezenvolve ekonomia ida ne'ebé inkluzivu no abertu lidera husi Timoroan-sira.

Ha'u mós hakarak aproveita oportunidade ida-ne'e hodi hatoo kona-ba Fórum Emprezariál Indo-Pasífiku tuirmai iha Vietname iha fim de Outubru, interesadu-sira bele hola-parte virtualmente. Fórum ne'e sei halibur líder-sira husi governu no empreza hodi diskute kona-ba enerjia no infraestruturá, ekonomia dijital, konetividade merkadu, saúde, no rekuperasaun ekonómika husi pandemia COVID-19, parseries no oportunidades komersiais entre Estados Unidos no Indo-Pasífiku. Ne'e oportunidade ida ba Timor-Leste nia Governu no líder emprezariál-sira hodi halo ligasaun ho iniciativas rejionál ne'ebé apoia kreximentu empregu no padraun aas dezenvolvimentu ekonómiku.

Fóku semana ne'e nian maka dezenvolve Timor-Leste nia turizmu doméstiku. Ita-boot sira ohin iha ne'e kalan ne'e, halao ona servisu iha área ne'e durante tinan barak ona. Ha'u aplaude ita-boot sira-nia esforsus. Lihusi expande asesu ba iha beleza natural no kulturál Timor-Leste nian, ita-boot sira hadi'ak liután ema lokál no vizitante sira-nia moris.

Ita espera katak iha tempu badak mundu sei loke hikas fali ba turista-sira. No katak liuhusi ita-boot sira-nia servisu, Timor-Leste sei preparadu atu Turista-sira bele hetan esperiénsia di'ak tebes iha ne'e – hanesan fatin-toba-sira, restaurantes, viajens, no fatin-vizita sira, no klaru kursu mergullu no snorkeling. Bainhira turista-sira fila-fali ba sira-nia rain ho esperiénsia pozitivu, sira bele sai influensiadór – tau postajen iha média sosiál hodi enkoraja ema-sira seluk atu Explora Fatin ne'ebé Seidauk Deskobre – buat ida ne'ebé ita koñese iha ne'e ho “Hau-nia Timor-Leste”, no ita-nia Timor-Leste.

Obrigada barak.